

Xi guazac blo

Nuu tu blo tu lo guia yárodux, chií
bzuloma casama nansi ra niz rmos gauma chi
laa curellm chuti.



Per chi guidxinnema ni ziadnema rot
nuchá ra ni yabteema xitrunadydii. Ziitizi
rsaman, per chi guidxinma nadyrun, chií
rníma: “Nasin naa guildaachaa donnuu
chuzande cayunne naa squí.”

Chií guasúbma guiquy tu yag
caldaachma donnuu chunií riatau
xnizrmosma. Ni guc ya xchi zubma cabiiama
nezqui, chi gubiiama laa tu bult ngasii ya
zedxingax rot rgucháma niz, guasglluntima
zema nezqui.

Chi bidxinma laa ni riatauin ya
caguílin donnuu calo blucháman. Chií
rapyma:

—¡Ei!, ¿xinde runiiu?



Chi bildesnií lonii, chií gunma tu
surrilynií, chií rapy surrily loma:

—Gua, rí caguiliia ni gaguaa, pur dxa
rmos ra niz rdxelaa rí.

Blo rapy:

—Gua, glligllití rsá niz ni cucháyaa
gaguua na lo curellm, per chi guidxiniia
gudxi xitrunadii. Nií rnía: “Naa guildaachaa
donnuu chunde runin.” Per na ya gunnaa lii
raun. Adrugundiiu zii, guatíly ni gau rot ná
xquel bin.



Chi bin surrily zii, chií rapyma lo blo:

—Tal racllanuu bdauan, cualdiza
donnuu.

Blo rapy:

—¿Ta barda rníu? ¡Blesi pe!


¡Pra, pra!, gu blo bluniia laa surrily. Ni
zeglluun blo cherun bdxingaxma lo surrily
icuxi!, bcuaxnguix surrily loma. Chií
bridxdia: “¡Oho ooo!”. Diza bcaytiap
loma bín surrily, “te te te” ziama par languet
axta bdxinma lo yu. “¡Tree!” biabma,
“orooo” bridxdia.



Chií dxisi nanema galnayan ni bdxá
xnguix surrily loma. Chi bidín, chií rníma:
“Nasin laa lúá biani, naa chaa ta donnuu cun
surrily”. iPra, pra, pra!, guasma lanyá zema
nez rot su surrily. Chi bidxinma, chií rníma:
“Adruchabigdia na”.

Lomarí lomarić, rá loma donnuu cun
surrily. Chi gucbéma laa surrily ya guní nez
tichma, rapy surrily:

—Ey, ¿chu rldaachuu?



Chií dxisi zuma, xitrínídima. Chií rapy
surrily loma:

—¡Bní chu rldaachuu!

Chií rapy blo:

—Xtgunnediiu naa, chií guinía.

—Aha— rapy surrily.

Chií rapy blo:

—Gua, ¿xizanií bchau lúa? Nilapa
nayandux bdxan laan lúa.



Chi bin surrily zii, chií bcuasama:

—Ja ja ja —rapyma—, xnguixanií,
ngultontnina.

Chi bin blo zii, chií rapyma lo surrily:

—Gua, níquiza diza rdíasurriliape,
ndxaládxpaza rldía xnguixuu. Na bcualo na
zeldaa

“Pra pra pra” baduxtiugma lo surrily,
chiítii bnazma zema.

